



## Puigortunngorneq Lewy body sunaana?

Puigortunngorneq Lewy body tassaavoq utoqqarni qaratsakkut nappaat, sumik patsiseqarnera nakorsanit ilisimaneqanngitsoq. Nappammut atsiussaqaq tassaavoq sianiuteqarfitsigut nappaatinik immikkut ilisimasalik tyskeq Friedrich H. Lewy, siulliulluni qaratsap sananeqaataani cellini allannguutininik kingorna Lewy bodies (Lewy-timitaanik) ilisimaneqarlersunik nassuiaasoq.

### Nappaatip ersiutai

Puigortunngorneq Lewy body kigaatsumik ineriartuaartarpoq, malussarissutsip imal. eqqumanerup allannguuteqarneranik aallartikkajulluni. Sivikinnerusumik sivisunerusumilluunniit inuttaata eqqarsaatai allamiippasissinnaapput ersarissumik paasinnessinnaanni imal. puullaaqisinnaalluni, qanorli inneq ullormit ullormut, nal. akunneraniit nal. akunneranut nikerarsinnaavoq. Inuttaa perusoqanngippasissinnaavoq, soqutigisaqarani, qasoqqalluni imal. misigissuseqarani, siviisumik ukisisarluni ullullu ingerlanerani nalinginnaasumiit sivisunerusumik sinittarluni.

Puigortunngornermik Lewy body -mik nappateqartut takorruuisinnaasarput. Takorruukkat uummarissorujussuugajupput, annikitsorpassuartaqarlutik pivisorpalaarlutillu, ass. inuusinnaapput imal. uumasut nipaqaqatik inimi tassaniittut. Takorruukkat sioranartuusariaqanngillat.

Puigortunngornermik Lewy body-mik nappaateqartut sisamaappata pingasut pitsorluttunngortarput kigaatsumillu pissuseqaleriartortarlutik. Timip aalatinneranut atatillugu akornutit sajuttunngornerup Parkinson-ip ersiutaanut eqqaanarput. nukiit annikitsut ass. inussaniittut kiinnamiittullu atorsinnaallugillu ataqatigiissarsinnaanerit aamma ajornerulersarpoq, oqalunneq nipikinnerulersarpoq kigaallillunilu, misigissutsinillu takutitsisinnaaneq annikillisararluni. Taama nappaateqartut ilaasa, oqimangiutinik uummarissunik eqqissiveqaranilu timip aalatinneranit sinnarliorneq, misigisarpaat. Sinnarliorneq ersiutit allat sulit takkutinningsut ukiuni arlalinni ineriartorsinnaavoq akulikitsumillu atugalluni.

### Nappaatip nalinginnaasumik ineriartortarnera

Puigortunngorneq Lewy body inuunermi kingusissukkat – nalinginnaasumik 70-ileereermermi aallartittarpoq, inuusunnerusullu nappammik tamatuminna eqqugaanngisaannarput. Amerlanertigut eqqaamasinnaaneq, ataatsimut isiginnissinnaaneq, ajornartorsiutinut aaqqiissuteqarsinnaaneq eqqarsartaatsimullu tunngassuteqartut allat, kigaatsumik ajorsartortarput. Inuit puigortunngornermik Lewy body-mik nappaateqartut eqqarsartaatsimikkut timiminnillu atuinermikkut arriillinerusarput. Timimik atuisinnaanerup akornuteqalernerit piffissap ingerlanerani ajornerulersarpoq.

### Danmarkimi qanoq atugaatiginera

Puigortunngorneq Lewy body, Danmarkimi puigornermik nappaatit atugaanerpaat pingajussarinngikkunikkut sisamassaraat. Puigortunngorneq Lewy body nakorsanit immikkut ilisimasalinnit allaat puigortunngornermit Alzheimerimit sajuttunngornermiillu Parkinsonimit immikkoortikkuminaassinnaammat, tamanna nappaatip qanoq atugaatigineranut nalornilersitseqataavoq.





# Puigortunngorneq Lewy body sunaana?

## Patsisaasoq

Puigortunngornermut Lewy body-mut patsisaasoq ilisimaneqanngilaq. Nappaatilli ineriartornerani qaratsami qanoq pisoqarnera nassuiarneqarsinnaavoq. Proteininit ajoqusisartut ammarlortunngorlutik katersuutilersarput takkulu taaneqartarput Lewy bodies. Nappaat kalerrisaarummik acetylkolin-imik, qaratsap sananeqaataasa cellit attaveqatigiinnerminni atortagaannik amigaateqarnermik nassataqarportaaq.

## Aarlerinaatit

Puigortunngorneq Lewy body utoqqaassutsip saniatigut ilisimaneqartunik allanik aarlerinaateqanngilaq.

## Kingornuttagaasinnaanera

Puigortunngorneq Lewy body kingornuttagaanngilaq.

## Nakorsarneqartarnera

Puigortunngorneq Lewy body ajorunnaarsinneqarsinnaanngilaq, utaqqiisaagallartumilli nappaatip ersiutaanik nipaallisitsisinnaasunik nakorsarneqarsinnaavoq. Nakorsaatit qaratsami kalerrisaarutip acetylkolin-ip, qaratsami sananeqaatinit cellinit attaveqaatitut atorneqartartup nungujartornera unikaallatsittarpaat. Qaratsap nammineq kalerrisaarummik acetylkolin-imik atueqqissinnaanera, nakorsaatit pitsaanerulersittarpaat. Nakorsaat puigortunngornermik Lewy body-mik nappaateqartunut tamanut sunnuteqartanngilaq, nakorsaatillu kisiisa atorlugit nakorsaasoqarsinnaanani. Sajuttunngornermut ersiutitut nakorsarneqarnissaq, napparsimasut ilaasa pisariaqartittarpaat.

Ulluinnarni siunnersuineq nalinginnaasutigullu tapersersuineq oqilisaassinerlu, nakorsaanermi pingaaruteqarnerpaapput. Psykosertunut (piviusunik piviuunngitsunillu immikkoortitsisinnaanngitsunut) nakorsaatit puigortunngornermik Lewy body-mik nappaatillit amerlanersaasa sapigarimmatigik, takorruuisarnermut nakorsarniarnerat ajornakusoorsinnaavoq.

